

Bon reunion entre Henny, Watty y Tico

UNION DEN CUMBRE DI AVP

ORANJESTAD(AAN): "Mi ta contento cu nos a crea e oportunidad trankilo aki pa reforza nos lazacion y reflecciona riba nos vision pa futuro", tabata e reaccion cu

DIARIO a logra di obtene di lider di AVP, Henny Eman despues di dos dia di reunion y combersacion den un ambiente tanto formal como fa-



miliar entre Henny, Watty y Tico na Costa Rica.

Ministro Presidente Henny Eman a expresa cu lo tin un conferencia di Prensa con hunto pa informa riba e resultado di e cumbre, pero si a adelanta cu tanto pe como Watty y Tico esaki tabata un bon encuentro y di sumo importancia pa e union den pensamiento y vision cu cual tanto AVP y Aruba mester worde dirigi.

Ministro Presidente Eman a expresa tambe cu Ministro

Vos ta sintie bon y solamente ta en espera ainda di resultado di algun chequeo pa reanuda cu forza y optimismo su encargo.

DIARIO por a compronde cu a trata e topiconan di e ultimo eleccion, reorganizacion y rehobenacion di AVP y prioridatnan di AVP den e Gabinete Eman III.

Den esaki a sali como prioridatnan grandi e ehecucion di Rapport Calidad, Plan Sasaki y Plan di Bario. Partido AVP a haya un apoyo grandi den pueblo pa e puntonan aki y kier realiza esakinan en grande mescos cu e redoblacion di pensioen, entreganan di tereno, fondo di garantia y benta di e casnan di pueblo. Esaki tabata puntonan clave di AVP den Gabinete Eman II cu a worde cumpli cune mescos cu a cumpli cu e rescate economico den Gabinete Eman I.

E dirigentenan di AVP, en especial Henny y Watty, a acorda cu lo bay duna nan experiencia y experticio na e hobennan den AVP pa

prepara nan pa e dirigencia di partido. Ministro Tico Croes a haya apoyo completo di ambos lider como e futuro lider di AVP. Tur aspectonan di e ultimo campaña a worde aclaria.

Tin Ministro Watty Vos bon di salud y cu full motivacion bek den Gabinete ta worde sinti como un punto di gran motivacion tambe pa e otro miembronan di Gobierno, en especial Ministro Presidente Henny Eman mes cu a conoce e valor di e aporte y colegialidad di Watty durante e periodo dificil tempo cu mester a rescata Aruba for di su peor crisis.

Durante di e conferencia di prensa Henny, Watty y Tico lo duna mas detaye riba e cumbre aki cu na Aruba tabata topico di combersacion y hopi speculation caminda tin hende a hasta pensa cu Ministro Vos su salud lo a bay atras. Pero nada di esaki ta berdad, mas bien Ministro Vos ta mustrand bon y e cumbre a duna un resultado refrescante pa e partido mas grandi di Aruba.

SOSPECHOSO TA PONE REVOLVER CARGA DEN BOCA DI VICTIMA

ORANJESTAD (AAN): Diadomingo madruga un caso serio a pasa na San Nicolas despues cu un homber Hubert D biba den Pos Chiquito a saca arma di candel pa un homber di inicial C y pone esaki den su boca cu intencion di tire mata.

E caso a cuminsa ora cu patruya di San Nicolas tabata yegando den un caya na altura di Santo Domingo Bar y ta mira e homber Hubert D y tambe un tal C ta bati boca cu otro.

Ora cu C a mira polis el a grita polis cu net un rato promer e homber Hubert D a menaze cu un arma di candel.

Ora cu Hubert D a mira cu e por haye den problema serio el a bula den su auto cu number A-18057 y bandona e lugar cu velocidad halto.

Despues di un persecucion chikito e patruya di polis a logra para e chofer Hubert D mey mey den caya grandi di San Nicolas y des-

AWE TIN CASO GREG PETERSON v.s. JOSSY MANSUR Y DIARIO DEN CORTE

ORANJESTAD (AAN) Awe lo tuma lugar den corte e caso cu señor Greg Peterson director di Free Zone di Aruba a entama contra señor Jossy Mansur y DIARIO, relaciona cu entre otro publicacionnan encuanto Banco Central y Free Zone di Aruba.

Riba 14 di October DIARIO a publica un informacion encuanto plannan di Banco Central pa cu Free Zone di Aruba, caminda den un reunion cu a tuma lugar, Banco Central lo a bin cu e idea pa bay propone gobierno di Aruba pa laga aumenta barbaramente belasting cu companianan den Free Zone mester paga y consecuencia di esaki lo tabata cu Free Zone di Aruba lo ser elimina.

Señor Greg Peterson no a gusta e forma con DIARIO a trata e caso aki y awe pa 3'or di atardi e ta entama caso contra DIARIO y señor Jossy Mansur.

AVIONNAN A BIRA LOOPS!!

